


3FA

5

SUSUKYEREW



# KASA MBRA

## Mfantse kasa ho mbra

### NYIENYIM

Dem ɔfa yi kasa fa susukyerew ahorow ho. Susukyerew ne nkyerewee ye nyimdzee soronko a ɔnnye Mfantse kasa nko mu na ɔwɔ mbom Borɔfo kasa na dza ɔkeka ho mu so bi wɔ hɔ.

#### Adzesua no bɔkɔ ewiei no, na osuanyi no tum;

1. Kyerew amandzɛɛbɔ susukyerew
2. Kyerew sukyere susukyerew
3. Kyerew nkyerɛkyeremu susukyerew

#### Adwentsitsir

- Susukyerew ye akyerew bi a ɔda adwen edzi. Susukyerew biara wɔ asentsitsir bi a ɔdze to gua. Hom bosua susukyerew ahorow ebiasa ne nkyerewee. Iyinom nye amandzɛɛbɔ susukyerew, sukyere susukyerew na nkyerɛkyeremu susukyerew.
  - Amandzɛɛbɔ susukyerew ye Susukyerew a ɔbɔ biribi a esi ho amandzɛɛ. Ɔye akyerewsem a ɔkasa fa asem pɔtsee bi ho dze da obi no suahu edzi.
  - Sukyere susukyerew ye kwan a yɛfa do ma esuafo kyerekyere nyimpa, bea bi, tsebea bi a obi akɔ mu anaa biribi no su wɔ susukyerew mu.
  - Nkyerɛkyeremu susukyerew ye susukerew a ɔma biribi ho nkyerɛkyeremu. Ɔma nkyerɛkyeremu mapa fa tsirasem bi ho, mbre wosi dzi dwuma bi ma no ho nsem da edzi yie.

## ADZESUA NO MU NSEM

Hen adzesua a otwaa mu no mu no, yesuaa biribi faa susukyerew ho. Ana ekaa **Adwentsitsir asentow** n'adzeban? Ebenadze nye **asentow a ɔma nkyerekyeremu**?

Enye wo nyenko mpensampensa mu na kyerew wo mbuae. Afei, fa wo mbuae no toto nkyerekyeremu a ɔwɔ ase ha yi ho.

### **Adwentsitsir asentow na asentow a ɔma nkyerekyeremu ho mbobɔdo**

Adwentsitsir asentow ye dza okitsa adwen pɔtsee a asensin no dze roto gua no. Asentow a ɔma nkyerekyeremu so ye asentow biara a ɔwɔ asensin bi mu na ɔboa ma adwen a ɔwɔ adwentsitsir asentow no mu no da edzi yie.

## Susukyerew

Nyimpa hia nyimdzee mapa ana oetum akyerew susukyerew. Ɔwɔ de ɔkyerewfo no tum boaboa ne nsempow ano yie na ɔdze to gua wɔ asensin mu. Mbre yesi ye iyi nye de, yeboaboa nsem a wodzi nse ano. Yekyerew hen nsensisii no ndzidzido na yema ngyinado a ɔfata nye ntotoho de mbre ɔfata.

Susukyerew ye akyerew bi a ɔda adwen edzi. Susukyerew biara wɔ asentsitsir bi a ɔdze to gua.

## Amandzεεbɔ susukyerew

Amandzεεbɔ susukyerew ye akyerewsem a ɔkasa fa asem pɔtsee bi ho. Otum ye abɔsirmusem anaa nokwasem. Ɔye ehiasem de ɔkyerewfo no dze kodzisem ho nhyehyee a ɔwɔ hɔ dada no dzi dwuma. Iyi bi nye, kodzisem no ne ngyinado, adwenkyere a ɔbɔ ebira na ne nkekaho a ɔhye akenkanfo nkuran ma wɔkenkan. Yetaa dze dzinhyeananmu me, mi, mo, mu dzi dwuma. Se ɔye nokwasem a, ɔwɔ de ɔkyerewfo no nya ngyinado. Kabea a ɔtaa dzi dwuma wɔ ha nye apaho kabea. Ɔwɔ de nsensisii no ne nkyerekyeremu no ye esiado esiado. Kasasu ahorow nye adwenmu mfonyintwa ho hia yie de mbre akenkanfo enyi begye akenkan no ho.

### **Nsem bi a yebotum akyerew ho amandzεεbɔ susukyerew**

- Kyerew dza osii wɔ da a odzi kan a edze kɔr skuul.
- Kyerew edziban a epe ho asem.
- Kyere Borɔnya akwanma a ndaansa yiara idzii no ho asem.
- Kyerew asem bi a osii a inyaa mu esuadze bi.

- Kyerew wo mbodzembɔ bi a wo were nnkefir da na kyere mbre isii bɔɔ dem mbɔzen no.

### Dwumadzi 5.1

Kyerew adwentsitsir asentɔw bi na ma ho asentɔw a ɔma nkyerekyeremu ebien.

### Dwumadzi 5.2

Kenkan dza ɔka do yi na fa woara wo nkasafua kyere amandzɛɛbɔ susukyerew no, no su. <https://open.library.okstate.edu/internationalcomposition/chapter/unique-characteristics-of-the-narrative-essay/>

## Ekuekuw dwumadzi

Gyina dza esua no do na pensampensa nyimzee mapa a yedze hyehye hen nsem wɔ asensin mu esiado esiado.

### Amandzɛɛbɔ susukyerew ne nhyehyɛɛ

Amandzɛɛbɔ susukyerew wɔ nhyehyɛɛ a ɔma akwankyerɛ ma edze kyere susukyerew no yie. Kenkan dza ɔwɔ ha yi.

<https://mhcc.pressbooks.pub/app/uploads/sites/31/2021/07/Narrative-Essay.pdf>

### Dwumadzi 5.3

Hom mpensampensa dza hom suaa wɔ akenkan no mu no mu.

Fa dza isuae no toto amandzɛɛbɔ susukyerew ne nhyehyɛɛ a ɔwɔ ase ha yi ho. Nhyehyɛɛ no nye nyienyim, asem no ankasa na ewiei.

1. **Nyienyim:** Iyi na yedze hye amandzɛɛbɔ susukyerew ase. Iyi na ɔma ɔkenkanfo no nya akɔndɔ dze kenkan susukyerew no. Nyienyim no na ɔda dza yereka ho asem no edzi na ɔbɔ nsentsitsir a ɔbeba akyerew no mu no tofa. Yetum dze asem bisa a onnhia nyiano hye ase. Afei, dza ɔkyerewfo no rebeka ho asem no ho nyimdzee bi so tum ba nyienyim no mu.
2. **Asem no ankasa:** Ha na ekyerekyerɛ w'asem no mu ankasa. ɔtaa ye nsensin ebiasa anaa no mboree a biara kitsa asentsitsir asentɔw na

nsentɔw nkaa a ɔboa nkyerekyeremu. Ha na eka w’asem no ankasa na adwempɔw ahorow a ɔse de ɔba wɔ akyerew no mu esiado, esiado. Ber na bea potsee a nsem no sisii no ho hia papaapa. Nsentɔw a wɔba nsensin no ewiei no taa ye dza wɔtwe adwen kɔ asensin a ɔtoa do no do.

3. **Ewiei:** Ha no, boa nsentsitsir a aka no nyinara ano bɔ no tɔfa. Fa wo nsem no nyinara bra ewiei.

Twe akenkanfo hɔn adwen kɔ dza aka no dada no do fa kaakaa hɔn.

## Dwumadzi 5.4

1. Beenu biara nkyerew ndzɛmba a no ho hia de ɔba asem no ankasa mu wɔ amandzɛɛbɔ susukyerew mu na hom mpensapensa mu wɔ hom ekuwekuw no mu.
2. Kuw biara nkyerew nsensin ebiasa a ɔfa afahye bi a ekɔr ase ho. Kenkan dza akyerew no na enye w’anyenkofo nye ho mpensampensamu.
3. Hom nkenkan akenkansɛm a ɔwɔ ase ha yi na hom nhwehwe asensin biara mu asentsitsir anaa botae nye ndzɛmba bi a ɔkyerewfo no dze twe ɔkenkanfo n’adwen kɔ akenkan no do.

*M’adzesua wɔ esuapɔn mu nyina no, nna minyim adze mapa. Nna me maame so robɔsɔw n’adzesua do. Ber a midzii nkogu wɔ nsɔhwe a metaa bɔ mbɔdzen wɔ mu, mu no, m’abrabɔ totoe a nna munnhu dza menyɛ moho.*

*Muhun moho de medzi ɔkogu koraa.*

*Midzii m’awofo nye mara moho so huambɔ. Afei, suro nye abawmubu hyɛɛ mo do. Moho boow me da mu no nyina na mibisaa moho de, aso dza esi no nnkehaw m’adzesua ntoado? Ana wobeyi me edzi anaa? Mbre ɔbeyɛ a bɔn bi nnkɔto me no, m’awofo na afotu mu enyimdzifo nye me kasae ma minyaa awerekyekyer. Hɔn adaworoma, wɔmaa m’enyi baa moho do ma muhun de enyidado wɔ hɔ. Ɔye nokwar de nsɔhwe kese a ɔtse dem mu ɔkogu nnda famu naaso mubotum aye edwumadzen ahwehwe kyerekyerɛnyi a ɔbɔboa me wɔ m’adzesua nkaa no mu ma mo mbɔdzɛmbɔ aakɔ kan.*

*Muhun de ɔkogu ne dzi ka abrabɔ ho. Dza ohia nye mbrɛ yebesi esuo mu. Mesanee so hun mfaso a ɔwɔ afotu ho. Menyɛ me kyerekyerɛnyi no hɛn nhyiamudzi no maa metsee ndzɛmba ase yie. Iyi maa mo mbɔdzɛmbɔ*

*kɔr sor. Nokwar, iyi ama mesua de, abrabɔ mu no, ɔmmfa ho akwansidze ahorow, ɔwɔ de daa yeper kɔ kan. Iyi na ɔdze nsesa kɛse baa m'adzesua mu ma medu mbre medu yi. M'enyi agye adzesua a menya no dza osii yi mu na mpontu a ɔdze aba m'abrabɔ mu ho.*

## Sukyerɛ Susukyerew

### Ebenadze nye Sukyerɛ Susukyerew?

Iyi ye kwan a yɛfa do kyerekyere nyimpa, bea bi, tsebea bi a obi akɔ mu anaa biribi no su wɔ susukyerew mu wɔ kwan soronko do ma asem no aada edzi yie. Ohia de wɔhyehye no yie na no mu nkasafua da atsenka edzi.

### Sukyerɛ Susukyerew ne nhyehyɛɛ

Iyi ne nhyehyɛɛ tse de amandzɛɛbɔ Susukyerew dze no pepɛɛɛr

1. **Nyienyim:** Iyi ye nsem bi a ɔpa dza yerebɛka ho asem no ho tam. Obotum aye asembisa bi a onnhia nyiano na mbom se yeryi ano a nkye ne nyiano bɔtwetwe akyerew no mu nsem epue.
2. **Asem no ankasa:** Ha na yɛka akyerew no mu nsempɔw no ankasa kyerekyere mu yie. Nsensin ahorow a ɔwɔ ha no mu biara dze asentɔw tsistir a ɔma akenkanfo no enyi gye de wɔbɛkenkan bi hye ase. Dem nsentɔw yi tum ma yɛdze adwen bu nsem a yebohu wɔ dem asensin no mu nye no ho mfatoho a ɔfata. ɔwɔ de asensin biara da adwen fofor edzi.
3. **Ewiei:** Ha na eboa dza aka no nyinara ano bɔ no tofa. Iyi mu na edze wo nsem no nyinara ba ewiei dze twe akenkanfo hɔn adwen kɔ dza aka no dada no do.

Tsirasem ahorow a yebotum akyerew ho sukyerɛ susukyerew na ɔka do yi.

- Sen bi a m'enyi gye ho
- Buukuu bi a m'enyi gye ho papaapa
- W'aborɔkyir nkɔree a odzi kan
- Wo nyenko brebo no ho asem

### Dwumadzi 5.5

1. Gyina dza esua no dada no do na kyere Sukyerɛ Susukyerew ase. Nsorsoree ben na ɔda Sukyerɛ Susukyerew na Amandzɛɛbɔ Susukyerew ntamu?



- a. Afei, hwe sen yi na kenkan dza ɔwɔ ase ha yi. Enye wo kuw mba nye mpensampensamu mfa Sukyerɛ Susukyerew ne nhyehyee ho. Nhyehyee no mu hendze na no ho hia papaapa na ebenadze ntsi a?

[A descriptive essay - Search \(bing.com\)](#)

### Dza ɔwɔ de yehye no nsew

- Ɔwɔ de no mu da ho ma akenkanfo nya ntsease prekoper na ɔnye tsirasem no ko.
- Fa kasasu ahorow tse de ngyinahoma dzi dwuma. Afei fa dzin tamsi na nyee tamsi so dzi dwuma.
- Fa tsirasem no ho nkasafua mapa dzi dwuma ma akyerew no ndzi mu.

## Dwumadzi 5.6

Kenkan dza ɔwɔ ase ha yi a wogyina do dze kyerew Sukyerɛ Susukyerew yi.

1. Dzi kan ye nhwehwemu wo tirasem no ho na fa nya adwen ahorow. Hye hwe wo nsem no de mbre ɔse.
2. Hye ase kyerew wo nsentsisir no gu ho esinesin.
3. Afei kyerew wo nsensin a asentow tsitsir wo mu no na kyerew wo nsem no yie ber a ehyehye nsempow no ndzidzido.
4. Kenkan mu hwe na ye nsiesie biara a ɔfata ana eyi wo nsa efi ho.

## Dwumadzi 5.7

1. Hom ntsena ekuwekuw na hom nkyerew sukyerɛ susukyerew mfa tsirasem '**Mbre Ghana nsaase no su tse**' ho na hom ndzi nkombɔ mfa ndzembra ahorow a hom hwɛ ho dze kyerewee ho. Hom nye krado de hom dze dza hom akyerew no na ndzembra ahorow a hom hwɛ ho dze kyerewee no boto gua.
2. Hwe mbre wosi dze kasa dzi dwuma wo sukyerɛ susukyerew na amandzɛɛbɔ susukyerew mu. Hom mfa dza hom hunii no nto gua.

## Nkyerɛkyeremu susukyerew

Iyi ye susukyerew a ɔma biribi ho nkyerɛkyeremu. Ɔma nkyerɛkyeremu mapa fa tsirasem bi ho nye mbre wosi dzi dwuma bi ma no ho nsem da edzi yie.

## Mbrɛ wosi kyerew Nkyerɛkyerɛmu susukyerew

Ansaana ebɛkyerew nkyerɛkyerɛmu\_susukyerew no, ɔwɔ de etse tsirasem a wɔdze ama wo no ase yie. Tsirasem mfatoho bi nye iyi:

1. Eɛnɔdze ntsi na ɔwɔ de nyimpa kɔ do ara kɔ wimu nserahwe?
2. Kyere adwenmu apɔwmudzen ho mfaso.
3. Kyerɛkyere ndua a wotwitwa no basabasa no nsunsuando.
4. Kyere mbrɛ abaefor nkitahodzi kwan si nya nsunsuando wɔ adzesua do. Se erebɛkyerew nkyerɛkyerɛmu susukyerew a, ohia de ehye dza odzidzi do yi nsew.
  - a. Kenkan dza erekyerew afa ho no yie na nya ntsease no prekoper.
  - b. Kenkan nsem fa tsirasem no ho. Dza ɔkyer w'adwen biara, bisa wo kyerɛkyerɛnyi. Ibotum akenkan nsem no bi wɔ abaefor ntentan do anaa mbuukuu ahorow mu.
  - c. Kyekye dwumadzi no mu nkakrankakra na kyerew.
  - d. Dwen mbrɛ ibesi ahyehye wo nsem no de mbrɛ ɔwɔ ase ha yi.
  - e. Gyina wo nsem no na susukyerew ne nhyehyee do kyerew nyienyim a ɔfata.

## Ndwendwenho dwumadzi

Iyinom ekyir no, ana nyimdzee fofor bi ho a ibehia a?

### Nkyerɛkyerɛmu susukyerew ne nhyehyee

Nkyerɛkyerɛmu susukyerew ne nhyehyee na ɔka do yi.

1. **Nyienyim:** Iyi na yɛdze hye nkyerɛkyerɛmu susukyerew ase. Iyi na ɔma ɔkenkanfo no nya akɔndo dze kenkan susukyerew no. Nyienyim no na ɔda dza yereka ho asem no edzi na ɔbɔ nsentsitsir a ɔbɛba akyerew no mu no tofa.
2. **Asem no ankasa:** Ha na ekyerɛkyere w'asem no mu ankasa. ɔtaa ye nsensin ebiasa anaa no mboree. Ha na ekyerɛkyere mbrɛ wosi ye biribi na adwempɔw ahorow a ɔse de ɔba akyerew no mu esiado, esiado. ɔwɔ de asensin biara da adwentsitsir kor edzi.
3. **Ewiei:** Ha na eboa dza aka no nyinara ano bɔ no tofa. Iyi mu na edze wo nsem no nyinara ba ewiei dze twe akenkanfo hɔn adwen kɔ dza aka no dada no do dze kaakaa hɔn.



Hom mbue dza ɔwɔ ase ha yi na hom nkenkan nhwehwe nhyehyee no. <https://www.quora.com/What-are-the-characteristics-of-an-expository-essay>

### Dwumadzi 5.8

1. Kyere susukyerew ase. Fa wo nyiano no to gua.
2. Beenu biara mbue na hom nkenkan susukyerew mfatoho a ɔwɔ ase ha yi. <https://assets.myperspectives.com/blog/expository-essay/expository-essay-examples/expository-essay-example-grade-7-pdf.pdf>
3. Beenu biara ndzi mbre wosi kyerew nkyerekyeremu susukyerew ho nkɔmbɔ na hom mfa hom nkɔmbɔdzi no nto gua.
4. Kyerew nkyerekyeremu susukyerew a okitsa nsensin ebiasa wɔ tsirasem yi ho. “Ebenadze ntsi na nkorɔfo kɔ do kɔ wimu nserahwe?”
5. Hom ekuwekuw no mu no, hom mfa mbre wosi kyerew sukyere susukyerew na ne nhyehyee ntoto nkyerekyeremu susukyerew dze no ho. Hom mfa dza hom hunii no nto gua.

## MBOBODO HO NSEM BISA

1. Kyerew amandzebo susukyerew a okitsa asensin kor per na kyere adwentsitsir asentow na nsentow a wobia nkyerekyeremu a owu mu.
2. Fa woara wo nkasafua kyere amandzebo susukyerew ase.
3. Kyere mbre ibesi egyina **mbre wosi kyere** na **nhyehyee** no do dze akyerew amandzebo susukyerew afa tsirasem “Suahu mapa bi a menya wo m’abrabo mu” ho.
4. Hom ndzi amandzebo susukyerew ne nhyehyee ho nkombu na hom mfa hom nkombodzi no nto gua.
5. Kyerew amandzebo susukyerew a okitsa nsensin ebiasa wo tsirasem “Akwantu bi a mo were nnkefir da” ho na kyere mbre wosi kyere amandzebo susukyerew. Kyere adwentsitsir asentow a owu asensin biara mu.
6. Kyerew mbre ibesi ahyehye wo nsem afa tsirasem yi “Mo skuul ho asem” ho.
7. Kyerew sukyere susukyerew a okitsa nsensin ebiasa wo tsirasem “Me nyenko berebo” ho. Kaa de ibedzi nhyehyee no do.
8. Ebenadze nye nkyerekyeremu susukyerew?
9. Kyerew nkyerekyeremu susukyerew a okitsa nsensin ebiasa wo tsirasem “Ndua a wotwitwa no basabasa no, no nsunsuando” ho. Kaa de ibedzi nhyehyee no do.
10. Fa amandzebo na nkyerekyeremu susukyerew toto ho. Kyere nse na nsorsoree a owu ebien no mu.

# NYIANO A WƆROHWEHWƆ NO MU BI

## 1. Susukyerew a okitsa asensin kor

*Kasakuw biara wɔ hɔn asaw a wɔsaw wɔ guabɔ ahorow ase. Mbea a wɔsaw dem asaw soronko yi bi nye eyiadze, afahye ase, bragor ase, bea a wɔma kodzi, ɔsom ase na adze. Asaw pii na wɔsaw wɔ mantɔw ahorow no mu a mpɛn pii no wɔsaw no wɔ afahye na guabɔ nkaa tse de eyiadze, awargye ase na adze. Wɔdze dem asaw ahorow yi dze gye nkorɔfo enyi na wɔdze tsetse nkorɔfo. (Mfatoho; Nkranfo hɔn Homowo afahye ase Gome asaw) Bi so nye Nkranfo hɔn Kpalongo asaw, Anwonafɔ hɔn Agbadza asaw, Akanfo hɔn Adowa, Sarmufo hɔn Bambaya asaw, Ga Adangbefɔ hɔn Patsa asaw na ne nkekaho). Asaw dodowara wɔ hɔ a ase fi Ghana kasahorow no mu.*

Asentsitsir asentɔw no nye “***Kasakuw biara wɔ hɔn asaw a wɔsaw wɔ guabɔ ahorow ase.***”

## 2. Nsentɔw nkaa no nyina ye nsentɔw a wɔboa nkyerekyeremu.

**Iyi fi :** [https://en.wikipedia.org/wiki/Culture\\_of\\_Ghana](https://en.wikipedia.org/wiki/Culture_of_Ghana)

- i.** Amandzɛɛbɔ Susukyerew ye akyerewtsen a ɔkasa fa asem pɔtsee bi ho na ɔda suahu bi edzi.
- ii.** Wobedzi kan ahwe tsirasem no na wɔaaye hyehyee wɔ ho ber a wɔdze dzinhyɛananmu ridzi dwuma na wɔaahyehye no esiado esiado. Ɔwɔ de onya biribi a ɔbema akenkan aaye enyigye.
- iii.** Nyienym, asem no ankasa, ewiei. Ohia de osuanyi no kyerekyerere kor biara mu kakra.

## 3. Nyiano no gyina abofra no ne nyiano no do. Mfatoho na ɔwɔ ase ha yi.

***Akwantu bi a mo were nnkefir da. Nyienyim***

Akwantu nye de efi wo fie daa daa dwumadzi ho kɔ bea bi do. Ɔma ihu mbeambea na ihyia nyimpa afofor so. Dem akwantu yi mu kor a mo were nnkefir da nye ber a menye m’ebusuafo kor bepɔw bi do nserahwe.

***Bepɔw do akwantu***

Yehyee akwantu no ase anapatutuitu. Yedze edziban, ntar na mfir a wɔdze twa mfonyin guu kaar mu. Nna kwan no war naaso nna akwantu no ye enyigye. Yetse kaar mu nyina nna yerotow ndwom, ridzi agor.

Yereben mbepow no, dza nna yehu wo ntokuwa no mu no ye few ara yie. Beebi mbre eboto w'enyi biara, ndua atsentsen na nkoko a no do aye ahaebun dukuduku demara na ihu. Nna oye de gyama yenam mfonyin mu.

### *Enyigye dwumadzi*

Yedur mbre yeroko no, nna oye enyigye keke. Ofi ho ko no nyina nna enyigye nkotsee. Yekeseraseraa mbeambea bi na yehun nsu a opram fi abotan do wo sorsor gu famu. Yehun mbowa aboyafo bi mpo a nna wowa ekyirekyir. Beebi a nna oye enyika kese papaapa nye ber a nna yetsena gya ho anadwe rototo eburow na binom so rema kodzi.

### *Akwantu no mu esuadze*

Minyaa adzesuadze pii wo akwantu no mu. Muhun nyame n'abodze ne few na hia a ohia de enye ebusuafo bobo mu etu kwan a otse dem. Mesanee so hun de akwantu a otse dem no nnhia ahoboaboa kese biara ana. Otofabi a, dza ohia ara nye de ebusuafo behyia mu, enya nkitahodzi soronko a obema woenya enyigye na suahu fofor bi.

### *Ewiei*

Bepow do akwantu a mutui no ye dza mo were nnkefir da. Nnye afefedze a muhunii no nko na omaa m'enyi gyee mbom serew, onuado na korye a okor do wo hen ntamu no so ka ho. Muhun de se yebo mu tu anamon a otse dem enyigye mu a, oma yekaa dabaa.

***Dza owo sor ho yi ye amandzebo susukyerew mfatoho a wakyekye mu ama no tsirasem nkakraba a wakyekye no no.***

7. Dza owo ase ha yi ye sukyere susukyerew ho nhwedo a tsirasem no ye "Mo skuul". Nyienyim no mu no, bo skuul no dzin. Kyere bea a skuul no wo na dza inya wo skuul no mu.

### *Asem no ankasaye adan no*

Mbre skuul no tse. Mekyerε, mbre woesi esisi adan no, adan no dodow na adzesuabea ahorow. Afei, ndzemba a wosua wo ho, ndzemba afor a woye ka adzesua ho, akyerekyerefo na edwumayefo nkaa no, skuul panyin na n'apamfo nye banodzifo ahorow, skuulfo, ekuwekuw na mfaso a inya wo skuul mu ho.

(Iyi botum aye nsensin ebiasa bi.)

***Ewiei***

Siantsir a ɔma w'enyiwa gye skuul no ho, dza ɔma skuul no bo skuul nkaa no nyina do, boa a skuul no aboa w'abrabo.

- i. Nyiano no tum sesa. Nhwedo bi na ɔwo ase ha yi.
- ii. Nyiano no tum sesa. Nhwedo bi na ɔwo ase ha yi.

<https://www.knockholt.kent.sch.uk/attachments/download.asp?file=641&type=pdf>

- 8. Iyi ye susukyerew a ɔma biribi ho nkyerekyeremu. ɔma nkyerekyeremu mapa fa tsirasem bi ho, mbre wosi dzi dwuma bi ma no ho nsem da edzi yie.
- 9. Nyiano no tum sesa. Nhwedo bi na ɔwo ase ha yi.

***Nyienyim***

- i. Ana edze nsentow ebien anaa ebiasa kyereew nyienyim no?
- ii. Ana edze nkyerekyeremu pa bi maa tsirasem no?
- iii. Ana wo nkyerekyeremu no fa tsirasem no ho a?
- iv. Tsirasem no mu da ho a?
- v. Ana wo nyienyim no ma akenkanfo per de wobekenkan?

***Asem no ankasa***

- i. Ana ahyehye wo nsempow no asensin asensin?
- ii. Asensin biara n'ahyese no, nkyerekyeremu no da edzi?
- iii. Edze ngyinado a ɔfata maa nkyeremu biara?
- iv. Emaa asensin biara asentow a ɔbo no mu nsem no tofa, ma ɔdze wo wura asensin fofor a ɔtoa do no mu?

***Ewiei***

- i. Esanee sii adwempow no do?
- ii. Asem no ewiei no ye dza ɔma ɔkenkanfo no nya ahomka a?
- iii. Ana ebɔɔ nsensin nkaa no tofa wo ewiei no mu?

***No korakora no***

- i. Ana wo nkyerekyeremu susukyerew no ma ɔkenkanfo no hu dza ereka ho asem no yie?
- ii. Ana edze ngyinado a ɔfata kyerekyerew wo nsem no mu?

- iii. Ana wo nsensin no nyina kasa fa tsirasem no ho a?
- iv. Ama ɔkenkanfo no n'enyi agye dza ɔakenkan no ho?
- v. Ana egya w'akenkanfo no nsem a ɔsom hɔn bo a?

Iyifi <https://palmspringsmiddleschool.net/wp-content/uploads/2013/12/ExpositoryWritingChecklist.pdf>

**10. Nsɛdzi na nsorsoree a ɔda amandzɛɛbo na nkyerɛkyeremu susukyerew ntamu**

- a. Amandzɛɛbo susukyerew ye akyerewtsen a wotum frɛ no kodzi naaso nkyerɛkyeremu susukyerew no su nye sukyere susukyerew sɛ.
- b. Nkyerɛkyeremu susukyerew ye nokwasem a no mu do na amandzɛɛbo susukyerew taa dze kasasu ahorow dzi dwuma.
- c. Amandzɛɛbo susukyerew tum ye nokwasem anaa abɔtsirmuka na nkyerɛkyeremu susukyerew taa ye nokwasem nkotsee.
- d. Mbuukuu kyerewfo taa dze Nkyerɛkyeremu susukyerew dzi dwuma wo adzesua mbuukuu mu na wɔdze amandzɛɛbo susukyerew dzi dwuma wo akyerewtsen mbuukuu mu.



## EXTENDED READING

1. Read for further knowledge: <https://www.grammarly.com/blog/expository-essay/>
2. Denenga, M. S. (2019). *Writing Mastery: Expository Essay: Expository Essay*. Munaii
3. Josephine, E. (2020). Narrative Essay <https://doi.org/10.13140/RG.2.2.29485.03041>
4. Lee, K. (2020). *How to write great essays*. Calvin Lee
5. For more on narrative essay [https://www.researchgate.net/publication/338778494\\_Narrative\\_Essay](https://www.researchgate.net/publication/338778494_Narrative_Essay)
6. Read for further clarification <https://myperfectwords.com/blog/descriptive-essay>
7. Neumann, J. (2016). *A professor's guide to writing essays: The no-nonsense plan for better writing*. 2<sup>nd</sup> Edition. Jacob Neumann
8. Read <https://fresh-essay.com/descriptive-essays>

## REFERENCES

1. Ackley, E. et al (1986) *Macmillan English 12* Macmillan Publishing Company 886 Third Avenue New York, NY 10022
2. Crew, F. (1987), *The Random House Handbook* (5<sup>th</sup> Edition) McGraw. Hill Publishing Company New York
3. MacGraw Hill, G. (2000) *Grammar and Composition Handbook* McGraw-Hill Publishing Company
4. Grieve D. W., and Pratt, K (1971), *Certificate English Language*, Western Printing Service Ltd., Bristol
5. Herfferman, A.W and Lincoln, J.E. (1982), *Writing, A College Handbook*, Third Ed. W.W. Norton & Company Inc. London
6. Marius, R. & Wiener H.S. (1988), *College Handbook* (2<sup>nd</sup> edition) The McGraw – Hill Publishing Company

# ACKNOWLEDGEMENTS



Ghana Education Service (GES)

